

四庫全書

集部

欽定四庫全書

紫山大全集卷十七

元 胡祇遹 撰

碑

大元故明威將軍同簽書東川行樞密院事王
公神道碑銘

人才之巨細門第之興衰福澤之可久不可久唯於易
代之際觀之則見之明斷之審大率英雄豪傑起身亢
宗有待而發四方無虞百揆時叙貴賤享宴安之樂而

無奇勲偉績之可為雖材智絕人既無所施無惑乎終老於庸流就能名一藝占一業三年一資五年一級而於大勲業大封拜則不可得矣時移世變崇極而圯天厭舊邦羣雄競起草昧之間王侯將相公卿大夫士之才立見於奮迹之始天下既定新天子崇德報功大則分茅土割方郡小則受一城封一邑治安之福與羣才共之然而或一再世而消削絕滅或三數世或與國祚同終始是豈偶然哉福澤之久者其德厚其功大其

家法備一再傳而絕滅者其德薄其功微其家法無足
取比如火之熱如冰之寒不可誣也今請以同簽書行
樞密院事王公為徵焉公之曾大父世為順天人適當
金季隱晦不仕兵亂家譜亡失名字不可考父沂字振
文官至順天路總管府權府事別有碑公諱仲仁起身
蔡國公帳下以才勇拜百夫長再受銀符鎮撫諸軍事
歲戊午分隸今開府儀同三司史公部曲扈從憲宗皇
帝平西南夷為上前驅數戰數勝首拔定元諸品柵六

軍遂得深入繼拔禮義長寧大懷苦竹釣魚四砦以功
寵賜黃金鞍勒憲宗皇帝曰為汝他日戰功之驗證未
幾宋將曹太尉李路分下嘉陵白水馬湖來拒敵奉旨
總率戰艦五戰五捷手刃二將於陣前宋兵溺死者無
慮數千憲宗皇帝喜賜黃白金二十斤今上嗣聖宣命
金符充都鎮府行軍千戶無何改授武衛軍千戶壇賊
構逆東方失寧佐經畧董公撫諭青齊所至尊揚聖慈
使民曉知逆順反側遂定使還佩海青金符入巴蜀按

視邊事事廻入對西南山川城郭民物風俗險易虛實
歷歷詳說如在目前上嘉嘆曰得人如此何事不濟特
恩陞山東路統軍副使兼總管造船事未畢宣命虎符
充眉州管軍萬戶眉入南徼尤深險前官不克負荷連
章乞謝職新進徵倅邀功欲得是任者交相稱薦衆議
紛紜久不決特旨教錫喇做者錫喇蓋云黃色指公而
言也鎮眉凡四年訓練精嚴戰守有法兵需精備小大
二十餘戰皆以出奇取勝聲聞於上賜白金重錦以榮

其功就佩以降虎符改充東川副統軍使宋賊寇成都入其郛焚毀大掠而去公提兵直趨嘉定半途與賊遇一戰賊北五十里死傷相枕藉奪其俘而還朝廷聞而壯之至元十年以功授明威將軍同簽書東川行樞密院事虎符如故明年總兵攻重慶與士卒同甘苦衝冒瘴毒卒於軍中公臨敵決勝智勇揚溢燕居無事則仁言嚴重不露圭角弟仲義武衛官鄂勒千戶仲禮百夫長兼亳州兵馬仲智滿城諸軍鄂勒官子男五人長曰

宏毅勇而文至元三年襲爵充武衛千戶八年改右衛
親軍千戶九年以淮南軍功陞昭信校尉職如故十一
年以渡江功再陞宣武將軍管軍總管行三衛親軍都
指揮使司事攻潭州城下十三年授明威將軍中衛親
軍副都指揮使十七年陞昭勇大將軍東路蒙古漢軍
副都元帥次曰寧起官昭信校尉右衛親軍千戶再陞
宣武將軍管軍總管餘幼若姪若孫詵詵繩繩玉蠻蘭
芽不可具紀嗚呼西漢功臣子孫至武帝而絕滅殆盡

豈非高明之下難以久處王氏慶門自權府公乘聖朝開運拜爵受封傳子傳孫揚歷五朝封爵日隆家聲益振繼繼承承益熾而昌厚澤遐福方興而未艾然則由人品巨細而知門第之興衰視履考祥而知福澤可久不可久以王氏一門觀之豈非明效大驗歟某年某月某日祔葬於先塋神道有碑子宏以狀來請銘銘曰

起身有道文武二途雜流邦官志士病諸唯同簷公勇廢萬夫忠肝義膽與生死俱出竒決勝暗合孫吳長寧

大懷白水馬湖古今天險勇困智愚不有其躬為上前
驅統兵東川蠻遠江漁益州被寇直入其郛繼以大攻
驅掠前趨設伏以擊奪還其俘賊駭奔竄棄甲焚艤益
人於今感泣歡呼東西二川狀固有餘付託得人百蠻
可圖大邦為讐報豈宜徐矯矯俛俛壯志靡渝聖意簡
在超付兵樞論功受賞弓矢形彊竭力報效歲時不虛
南夷未平中道薨殂蓋棺馬革費志兵墟忠臣有子益
昌門閭繼志述事金虎章符贈謚有日墓碑可無銘以

紀實三嘆而書

蕭千戶神道碑銘

國朝命官襲爵既優既渥子孫非有大過惡繼繼承承而不廢絕世祿已久日黯前人光是亦貴富之所養中才庸品之常情無足怪者不荒侈於鷹犬裘馬不淫蕩於聲色甘肥不驕矜於父兄閭閻不陵人以威儀技藝吾於蕭公千戶見之矣千戶姓蕭諱世昌其先遼貴族五世祖阿薩爾仕遼為羣牧使四世祖奇拉爾贈鎮國上

將軍上騎都尉河南縣開國子高祖栢德本贈輔國上
將軍輕車都尉河南縣開國伯曾祖圖薩拉贈奉國上
將軍河南郡開國伯祖德亨朝廷以開國歸義之勲爵
奉國上將軍官彰德路總管兼行軍總帥府事考某征
南行軍千戶公數歲而孤入小學讀書不勤師友不偕
羣兒戲笑視聽動止端重淵靜如老成人學對屬即知
聲律物象竒辭英氣精密雄偉常勝其偶九歲襲爵受
萬戶府劄充鄂勒千戶十二歲體貌壯麗魁然一竒男

子拜命金符管軍正千戶歲己未扈從渡江中統建元再拜恩命千戶如故三年壬戌討平叛賊李璮復立宿州并縣西城至元六年春南征五河口臨敵手馘四十餘人獲戰艦二軍實不計以功為山東路統軍司薦申行中書省省擬上聞遷陞不幸以明歲正月十有六日感風疾而歿年二十有六聞者莫不哀悼夫人段氏嚴東平魯王之外甥千戶君亡時年二十有四即自貶損膏腴貴習不御華飾守節教子成夫之志今其子亦襲

爵有年矣以某年月日將塋於某所遣其子某奉狀以
公之墓碑來請銘余接見蕭氏祖考子孫凡四世矣千
戶軍不惟有出藍良最之譽在一時世官子孫少見其
比吁使天假以壽竒勲偉績其可量也哉今既惜其才
器而又哀其短天不能不為之銘銘曰

嗟嗟造物實艱實難萬愚一賢保全或慳蕭氏之子百
草之蘭紫庭未升風霜夜寒蕭氏之子羣鳥之鸞一飛
未舒瘡痍羽翰嗟嗟造物知誰控搏與之不易奪之匪

艱三世將門豈非其端我知斯人不尚忍殘彼蒼者天
呼號莫攀龍韜虎畧鐵衣石棺風水沄沄松柏丸丸壽
短名永神其安安

承直郎江西等處榷茶都轉運司副使李公神
道碑

公姓李氏諱瑞字君祥世恩州人父郁徙居鄆城遂占
籍焉祖珪仕至大名府檢法曾祖玉河南府判官公幼
失慈侍居憂哀毀羸瘠以孝聞鄉里年十七出贅於邑

人續氏時明經射策貢舉進身之法皆廢又不能治生農工處市井中遂商賈為業知人棄我取人取我與之機且庶以信視列肆貪刻者人多歸之因以致富累貨巨萬公嘆曰不過為守錢虜富家翁耳矧商居四民之下不足以汙吾身於是立志讀書涉獵經史東平總管府經歷司知公氣宇不凡辟為書記習熟吏事至元五年本司保舉充鄂囉濟駙馬位下人匠局知事七年制國用使司選擢通廉知錢穀者以公充濟寧府鄆城縣

行用交鈔庫副使終任之間會計無偏失鈔法流行居
民行旅皆以廉平稱十年中書吏部符遷授平陽路收
差庫監支納十二年除恩州酒稅醋三務大使削苛細
務寬平課額增羨而民說誦無怨謗江南平定朝廷以
戶口繁庶鹽法不可不謹宣命金符從仕郎提舉浙西
鹽使司事置司於平江府鹽法設竈戶給工本煮鹽入
官照引出發前政亟炎方初下新制未定竈緣苟且為
欺蔽尅削竈戶工本寒餒瘠乏官鹽不足原額私煎不

能禁公私俱擾公到官立革宿與家給人足布宣教條
令行禁止歲課日增十六年陞承直郎宣授江西等處
榷茶都轉運副使比署事同衆公議給遽採造罷巡禁
之擾驗實出賣歲終課額倍增秩滿得代二十年行中
書省以公廉幹特委會計杭州酒課二十一年後五月二十
有九日不幸以疾卒年甫五十矣夫人續氏之弟德新
同夫人梁氏護柩還鄉里是年十一月二十有二日祔
葬於鄆城宜邱之先塋公天資穎悟器宇弘深心計鞭

莫不大聲色而辦吏事尤精敏義於周急視貨財如糞土好賢樂善與人交竭誠以敬嗚呼公剖煩理劇有猷有為之才百無一施惜乎天不假年可哀也哉雖然韓文公銘李充實之墓曰生而不淑孰謂之壽死而不朽孰謂之夭若公者生淑而死不朽者也德新持里人杜亮紀公生平之狀以神道碑銘并序來徵言謹序而銘之銘曰

智周於利志喻於義積而不居通而不器以財發身以

德御氣長鯨海濤大鵬風翼進也無難退也何易數耶
命耶所期力致材耶學耶有用不既中壽而殞半途而
廢勒銘墓碑以俟貞謚

故大名路徵收課稅所長官耶律公神道碑

公姓耶律氏諱澤民字濟之其本出自遼太祖族號大
橫帳曾祖赫嚕金正隆間官輔國上將軍同知北京留
守事致仕卜居大興之西安縣故子孫占籍焉祖烏達
噶潛德不仕祖妣蕭氏考克酬巴爾字閏之謹厚明敏善

騎射知漢文章明昌六年以門資補官桓州酒監我朝
兵萬餘掩至城下率衆力敵我兵引退有司以戰功聞
陞高陽尉考終無犬吠之警縣人刻石頌德遷定德遷
定興令以廉幹稱太祖皇帝提兵南下力窮出降授翰
林待制歲戊寅賜佩金虎符行諸路便宜事乙酉扈從
西征病卒妣蕭氏封河南郡夫人公幼穎悟洒落不羈
以任子襲爵年三十壬辰南伐佩虎符提點軍前橋梁
芻粟事所下城邑間有士大夫被俘執者即以私財購出

之全活者衆士林于今稱之己亥以從軍之勞授大名
路徵收課稅所長官丁未北覲六月十有七日遘疾薨
於西京之傳舍享年五十夫人劉氏蕭氏子男二人長
曰泰亨襲公爵後用河南等路經畧使薦提領陝虢二
州事中統改元復長大名路課稅所事至元十年改授
單州尹次曰貴亨孫男一人曰庭傑公尚氣義輕貨財
交游日滿門雖傾囊倒廩一供宴享之樂而不恤遠鄉
寒士受公之惠者不可計與人交樂易開豁略無貴豪

習氣初南征迴一時將帥車馬囊橐實以子女玉帛公之所得法書名畫異文秘典寶琴佳硯而已餘一無所取也公薨之某年既葬神道有石泰亨紀公事業來求銘銘曰

世祿後昆鮮能處仁驕奢淫佚辱宗敗身惟公貴胄世里支親光耀先哲超踰等倫尚氣以義潤身以文好客投轄患窮指囷達不放曠狎不囂紛艾服官政壯志方伸半途而殞埋恨昌辰萬生賢嗣益大其門

大元故奉訓大夫知宿州事張公神道碑銘

公諱裕字仲容澮陽人曾祖諱鎮完顏金管軍千戶祖
諱黨敏不仕考諱演仕我朝主澮陽簿妣李氏公起身
刀筆補磁州州吏歲庚戌陞本州從事以廉幹中統建
元宣撫司薦陞澮陽令再除成安令至元二年改授沙
河令縣南門臨沙河沙積城平每南風塵沙飛激居民
不能飯公身教士人樹高柳三匝近南萬株柳茂密沙
塵不能入炎夏行人困渴休息於綠陰芳草解鞍停輪

移時不忍去所剝繁枝充公私薪爨不數年巨材足以
充梁棟一舉而四美具公平生材智類如此四年充邢
臺令廨宇倉庫為之一新十年受承事郎武清縣尹遞
運江南寶貨自至上都無毫髮損失都堂嘆賞籍記陞
遷十六年改承務郎同知清州事二十三年陞承直郎
西京總管府判官省部摘委應辦御史臺保呈二十八
年陞奉訓大夫知宿州事是年十月十有二日以疾卒
享年六十有九配扈氏先公卒再娶李氏子男一曰蒙

古岱管軍百戶女二銘曰

智如流水隨物賦形仁如時雨潤物無聲龔黃台杜四
美難并大官貴客交口稱能紛擾繁劇無滯無凝目中
尺度意外權衡人艱以澁我和而平老當益壯奄忽佳
城勒銘墓碑以永鴻名

守貞女靜散入女冠左鍊師墓碑

鍊師姓左氏世為安陽陵岳人故孝弟力田業進士左
某之女彰德路權府事兼安陽縣令王信之妻安陽縣

丞王鐸之母奉訓大夫荆湖北道宣慰副使武安胡祇
適之妻母孝慈勤儉十九歲而適王氏時貞祐後河朔
兵亂彰德當四通八達之要衝日尋干戈貴賤無寧居
師幹夫之蠱雖流離頓挫顛沛急遽之際善自保防未
與夫一日相失也其夫自農里立軍功仕至縣令外府
僚內助之力為多甫三十九而寡即以不再醮為誓居
喪三年未嘗見齒服除脂粉色服屏棄不再御蕭然寄
心於清淨寂滅時子鐸未冠師曰為人之母不成其子

他日何面見所天於九原遂力與二三女奴紡績織紝
訓諸僮以力田教子以讀書習騎射不數年而竟襲父
爵次女既笄曰吾必擇讀書知道義家子弟而歸之一
時權貴媒妁慰懇問聘終莫之許遂適武安胡氏男女
成立田園增其舊一日會親戚閭里曰人生為男子功
成名遂身退天之道也况予一婦人乎自茲以往兒女
輩勿復以家事相關白乃於後庭隙地築環堵室禮天
慶宮李真人受業野服黃冠賜名守寬以道自居後數

歲築庵於王氏別業梁固村之乾隅手親畚鍤建老君殿西廡東庵丈室齋堂俱為之備以道行清真嘉號於長春宮曰守真玄淨散人壽踰八十視聽筋力不衰體癯而神王晨暮香火經函益自嚴謹雖大風雨寒暑不廢某年月日享年八十有八無疾而逝一子即鐸也娶劉氏封縣君三女長適龐氏次適胡氏次適馬氏孫男三人長以軍功拜百夫長次亦以軍功拜千夫長次早卒孫女三人曾孫男三人孫女七人銘曰

貞幹而良慈順而剛母儀婦常德將禮防終焉允減男
知義方仕路騰驤女從姑嫜蘭玉芬芳學仙徜徉雲局
霧窓麻衣野裳琅函寶章心閑歲長萬慮俱忘觀化四
方飛空蛻囊貞骨深藏虛靈不亡我銘孔彰

集真觀碑

人無貴賤家無巨細承先世之業增崇而光大者易不
階尺土片瓦以身起宗又能傳守得人者難此乃四民
雞鳴而起孜孜為利者尚且若是而況以清淨無為閑

寂淡泊為學者歟即今老氏之流男女三十萬其人之才不才干萬不同有握拳衣毛褐囊無一錢不數歲之間而能建立宮觀危樓傑閣大殿長廊數百楹者有借榻乞席栖栖朝夕老死而無蓋頭茅一把者有呼吸咳唾而聚徒百十衆者亦有隻身孤影而不能得一僮僕者亦有承先師富盛之業日漸寥索徒侶散亡而門闌蕭條者以是觀之內能成身外能成物雖剛健有為之男子千萬中不十百矧女子之柔懦乎彰德衙城外堧

西康樂坊道宮一區曰集真寔女冠楊守和之創始也
守和年四十有一夫李義死誓不再醮携一女受道服
後得弟子曰守真同師天慶宮重玄真人為黃冠玄默
抱璞不將迎不妄求取誠實積久人益信服爭願割財
以施與買地以宇殿堂齋厨像設具備鐘磬香火晨暮
嚴肅歲癸丑受道號於真常真人曰純素散人庵曰集
真觀享年七十有二日集門弟謂曰守真寬和謹厚道
業日進吾有後矣龐守正宜佐之明日吾遺世矣翌旦

盥櫛冠服怡然而逝守真既主嗣事克紹光烈亦受無
為散人之號于誠明真人守真仙去守正繼之守正自
七歲服道衣於今將中年信道篤戒行愈嚴純素散人
之夫家父母家皆無後守正感慕師德二家墳壠歲時
伏臘封樹祭祀不廢手植墓木合抱成列鄉人嘉之至
元丙戌冬吾同舍友儒醫單濟民踵門而言曰守正吾
甥也願乞文于子發揚師友之德紀錄集真觀卜築之
勤劬使後人繼繼不絕大書深刻諸石惟高明進退之

濟民端人也言必不妄讀其所持之狀聽其言而信其人若守和者可謂以身起宗能為剛健壯夫之所不能為守真守正能世其業不辱守和傳守得人之明敢以朴辭較其同流之優劣而紀其實

磁州嘉福寺賢公講主碑

僧以經明行修為本僧學佛者也佛去世久不獲親炙誦講佛言遵履佛行則亦庶乎其佛矣未有不讀佛言不踐佛法而能佛者也不苦學不精鍊者固為誕妄然

馳騁乎記念辨博乎抄疏終身文字而實無所了悟自得者亦非善學佛者也磁州嘉福寺賢公講主終於至元之十六年冬十有一月十日又八年門弟文慶狀公之平生請銘其碑公姓武磁之武安人世業農生九年師叔父惠公和尚受僧服於嘉福得名道賢口授法華經背誦不脫一辭自是誦經讀書卷帙不去手年十有八四方游學過曲陽講習於源唯識席下年三十聞橐城觀音寺潤唯識僧中之龍象趨走聽受學遂精明年

高德劭主壇開講唯識大論繼無虛歲歲丙申復還嘉
福歲丁未傳法潤和尚戒於大名百師會下緣法日盛
建立武安固鎮名刹八區前後賜法傳戒講主三十有
八門弟五十人至元二年同僧統洎諸名公入內殿祝
聖壽九年聖旨集諸路僧受戒僧司薦公召入萬壽大
殿贊頌稱旨蒙賜法衣一襲受戒于國師加號吉祥十
五年作水陸大會立浮圖葬其師惠公像金佛于左域
崇福寺公比長逝前三日聚門弟囑以殯葬喪祭儀及

親族喪禮輕重一一適宜付法衣一襲于本州僧錄才公遂瞑目焉其明了如此銘曰

口誦佛言心傳佛印童受僧服不退而進德懋年高聲聞天朝賜衣榮歸光照雲霄報本像佛建塔奠師是身了了不掛一絲自無有來復無有去擺手便行何戀何慕公無世愛人不公忘豐碑嘉福愈久彌光

齊聖廣祐王廟碑

人之誠敬油然而自不能已者昭著于禱祠祭祀不待

教訓刑政懇切齊一費貨財苦筋骨快樂而不為疲倦
原其情則生於報德酬功不能忘本是故天子祭天地
諸侯祭境內名山大川庶人則祭其祖禰非所以徼求
諸利而苟免禍患也聖人因人情而定禮凡有功德於
生民天地六宗以降聖帝明王聖師大賢忠臣良吏載
在祀典春秋香火血食永永不絕唐澇陽令崔府君以
聰明正直誠一之德形于政治除暴虎祛妖狐雨旱捍
水惠澤一方至於幽冥靈異福祐後人者又不為不厚

宋景祐元符宣和紹興嘉定增封爵前賢紀言昭著詳悉金國以宋祀未絕江淮未庭奉神代享衡山之祭至元十五年中書省奏先是南嶽阻於長江不獲致禮以崔府君攝享金殘宋滅南北五嶽通祀府君封號難襲故常聖旨增封齊聖廣祐王勑守土偹禮告廟仍大書深刻門額州民李某等竭虔致敬踵門而言曰自神靈之在祀典宋金兩朝雖加崇敬而貴不過公侯未若我朝巍然封以王爵是可不紀石以歌頌皇帝之神功聖

德混一六合五嶽之氣不分裂隔限於南北於府君封
爵極其崇高廣祐我國家敢以文為請竊唯鄙賤世居
武安在磁為屬邑實處神靈麾麻之下謹再拜齋沐而
獻頌曰

皇帝仁聖克享天心際天所覆柔撫照臨類禋柴望無
文咸秩神之封爵宜致其極神之齊聖德符於謚神之
威靈民愛而畏洋洋在上浩浩無外豈惟是州神獨所
在天錫皇祚與天同壽享我明薦神助其祐

太清宮碑

人生而靜性也天也一受其成形而反為形氣之所累
智巧利欲交戰於中美麗紛華百誘於外心死於臭腐
形敝於塵滓然則所謂首出庶物虛靈洞徹配天地而
為三才果安在哉人自失之賢者能勿喪耳勿喪有道
乎傳曰養心莫善於寡欲又曰無為而治者其舜也歟
後之為臣者亦有省事清心之諫洗心而不著一物理
繁而不勞有為靜而與陰同德動而與陽同波不離世

法不著世法鏡瑩水淵萬變去來了無留跡此古之弘
衍博大真人內聖外王無臭無聲者也所以老莊氏談
清淨無為恬淡自然一死生齊彭殤塵垢此生腐鼠軒
冕豈無為而言之耶迷而不返執而不通者苟有少悟
如刑人之脫桎梏病人之去沉疴其功豈淺淺哉自性
理道德仁義之教廢魚肉於功利鋒鏑於詭譎糜爛湯
火於得失紛競聲瞽於聲譽文采無故而病無病而死
無災而天天殃鬼誅人禍紛紛籍籍而莫之救有人於

此而能薄口腹外形體塵視車馬銖視金玉粧飾名爵
觀化樂道忘神養虛置身於蜂蟻蝎蠅之外雖未至於
內聖外王其賢於人也不亦遠乎吾於黃冠管志通見
之矣志通字和叔玄門宗主高其年行賜號壽齡子世
為稷山人年二十四棄家著道士服於今七十有一形
癯神王目光如巖下電步風袖飄舉性朴直曾次開朗
明白貌若嚴古無崖岸接物則豈弟樂易言直而溫意
誠以慈道業餘暇喜以神膏異藥療瘍愈疾由是人益

愛慕尊敬之過市則以不得留飯請教為歎恨河東土
風雄實民俗誠厚駐烏既久得地於鄂南卧龍街袤廣
畝六有奇囊無一錢不文疏乞貸報本事神之誠孚格
有衆巍然煥然神宇屹立法象昭嚴三清五祖前後相
承東西廡察舍庖廩井廐園圃無不序備落成揭額曰
太清踵門來言曰子為我文諸石以勸來者無荒無怠
非求名之為也既諾其請以謂太清之取義言教之汙
隆人皆知之不言而彰斯人也信道篤得趣深報本誠

是宜銘銘曰

紛萬有總一無等浮雲通太虛嗟人生趨迷途心形役
如老奴一念起百垢汙化靈府為穢區死醉夢永不蘊
偉斯人智若愚祕此身同傳車志有在天為徒脫塵網
欽聖謀思報本非要譽未厭世香火俱闢朱門開綺疏
列琅函藏天書鐘磬聲穿雲衢觀萬化泡影如閱春草
青階除

欽定四庫全書

集部

紫山大全集卷十九

詳校官庶吉士臣朱理

侍讀臣孫球覆勘

謄錄監生臣秦灝

謄錄貢生臣王兆泰

欽定四庫全書

紫山大全集卷十八

元 胡祇遹 撰

墓誌銘

耶律氏墓銘

遼太祖之別族號大橫帳生赫嚕金正隆間累官輔國
上將軍同知北京留守事赫嚕生烏達噶潛德不耀烏
達噶生克酬巴爾佩金符行諸路便宜事實公之皇考也
公以任子得官生三十歲壬辰我師平汴佩金虎符提

點軍前橋梁芻粟得一城下一邑俘奴中聞有士人即以私財購出之己亥以軍功授大名路徵收課稅所長官丁未北覲以病卒於官享年五十娶劉氏封涑水彭城郡君再娶蕭氏子男二人泰亨甫冠襲爵授大名路徵收課稅所長官佩金符歲癸丑改授提領陝虢二州事中統二年復任前職至元十年改授單州尹越四年授同知安豐路總管府事十六年同知蘄州總管府事次曰貴亨孫男一人曰庭傑早卒重孫男郝驥尚幼公

生長於閑閑不凌人以賢驕人以貴輕財好施尊賢重
士海內名士納交求識者日滿門居顯位二十年而家
無餘貲至元十八年十二月五日卜塋於安陽高穴村
賁亨狀公之生平請銘其墓銘曰

生長閥閱豪習罔聞甫冠襲爵力排青雲居官三年寵
命日新提本戎行時雨春陽解釋囚俘不責報償驥足
甫展鐵弩方張天不假年中道云亡賢哉後裔益增前
光刻石埋名孝思不忘

正議大夫兩浙都運轉使李公墓誌銘

公諱秉彝字仲常世為通州潞陽人歲癸丑遷居於相故又為相人焉曾祖貴妣尹氏祖濟妣張氏考瑀贈懷遠大將軍洵州鎮撫軍民兼三河令妣某氏公幼穎悟以兵亂廢學既長自知讀書涉獵經史工書翰篆隸尤得法考正前人謬誤作韻譜一編起身從仕平章錮祐祿公一見器重之承制授行省都事從平章公南征破唐鄧下襄陽古郢婉畫為多歲己未六師渡江諸將爭趨

玉帛子女公橐經傳子史文集以歸丁外艱中統建元
除太原等路宣撫司員外郎奉官長和同列司政最諸
路二年改西京等路宣撫司郎中三年遷中興等路行
中書省左右司郎中士夫南冠為奴者甚衆公言於省
官聞奏為良立學給田以食之四年轉陝西五路四川
行中書省左右司郎中值奸人費正寅之誣告申明被
譖者之冤抑朝廷多之至元元年除戶部員外郎三年
佩金符官大中陞彰德路轉運使以課額增七年授中

議大夫尚書戶部侍郎八年授中書戶部侍郎兼提點漕糧增運萬二千三百石九年陞奉政大夫都提舉漕運司事官吏坐耗損被桎梏者百人公訴之省廷咸蒙釋免水灾民乏食開倉廩貸絕食以起餓殍十二年拜大中大夫西蜀按察副使兼勸農事理冤獄築水堰溉田萬頃土人刻石頌德丁內艱十三年以墨經起佩金虎符陞嘉議大夫江州路總管兼府尹適歲旱下車禱雨而兩部民妄以謀反相告言同僚即欲臨之以兵公

疑其誣罔同時大族朱陳二氏屈為同族以謀反告公
欵曲審諦實無反狀活萬一千人九江文廟火公創為
一新學田萬頃為權勢侵奪力復其舊十五年除湖州
路總管德化浹洽閩境大治以疾寓京口十八年起為
常德路總管築隄以防捍水災減租稅以寬民力發粟
以賑貧乏未幾朝廷以理財擇人拜兩浙都轉運使郡
人遮道攀送去思不已紀德於石題曰李公惠愛碑兩
浙鹽額不周歲增萬一千二百錠擢授中書工部尚書

在官未三月兩浙官曠復授前職不幸感疾退居京口至元二十四年四月十八日薨於寓居之正寢享年六十有五夫人孔氏車氏孔夫人婦德母儀中表可法子男五人楨棫梓楩楨楩早世梓池州建德縣令女二人是歲某月某日祔葬於臨漳彰隆村之先塋公卧疾有詩云鄉闊落日蒼烟外樽酒寒花寂寞中以公之明達殆知命之言歟棫等持狀以曠誌來求銘銘曰氣和而醇言簡而溫臨政論斷有經有綸雍容慎密應

機若神鞭算心計太山一塵雖曰用知必依於仁草檄
談兵蒲鞭撫民不猛以寬義訓諄諄哀矜忠愛寃苦獲
伸公退嗜學琴書詩文時議人望阿衡秉鈞事繁食少
歛翼青雲費志以歿嗚呼斯人

怡軒先生胡德珪墓銘

孝友慈祥豈弟樂易不倚不流匪凝匪滯繼志述事力
擢高第可智可愚允協厥世不貪之富自得之貴六
十八年俯仰無愧祔塋幽深永蔽天地泣血書石孤子祇

適

姜氏墓銘

寡不再醮惟貞惟剛世衰教微冶容夫喪惟此姜氏三十而孀孝養舅姑益謹於常姑憐欲嫁守節愈強不盥不櫛坐以待亡姑寧怒笞義其可忘一女得婿歸保榆桑婿事如母逾三十霜壽六十七卒墓夫傍廊詩栢舟於惟共姜假以作銘以誌深藏

維山先生杜君墓誌銘

先生諱瑛字文玉姓杜氏世居霸州信安人曾祖信祖植妣張氏考時昇字進之塲屋有聲金走汴先生扶奉渡河寓緜山養親讀書金亡徙寄絳州洛陽取友溪南詩老辛敬之李欽止楊紫陽涵肆六經百家書兵餘典籍灰燼每假一書手自抄錄由是義農唐虞以迄於今聖賢之謨訓功業歷代之治亂得失歷歷成誦中書鈕祜祿公開府招聘為幕賓遂家彰德傳經授業後學滿門中統建元立十道宣撫司左丞張公首奏先生提舉大

名六郡學校事傳道餘暇著皇極疑事皇極引用極學等書春秋地理源委二卷經子說一卷律歷律呂禮樂雜志七卷典故三卷史說一卷語孟旁通二卷晚年知道之不行凡詠物寫懷一寓於詩每對花臨水持盃自適曰風俗教化至此吾欲何為耶獨詩集行於世餘書未脫藁至元十年某月日以壽終享年七十塋安陽王裕村夫人孫氏謹約端靜先生閑居終身奉養不失節後先生九年歿享年七十有八子男三人長曰處思警

穎才學未冠元遺山賞其詩文許以大器不幸年十有八而天次處立能世其業今以文學為鄉校師季處愿濟寧總管府經歷官女娥適李氏孫男三人曰堅早卒曰愚曰齊奴皆幼先生將終命二子曰吾櫟中置杜詩一部餘無所用書封石曰維山杜處士墓先生儀觀秀偉身長七尺美鬚髯望之如神人於書無所不讀不精老釋醫藥亦皆洞究二十九年秋處立乞監察御史祝慥狀先生德業以墓銘來請且以不肖拜識先生里閈

往來近四十年知先生為深故也嗚呼唐孟東野老於軍叅謀宋蘇老泉僅得一文安薄天爵人爵造物者固不並耶抑天理固然而不能全耶人乖天耶天悖人耶以先生之才學老於衡門不得掌帝制潤皇猷謀王體斷國論責志以歿窮理者不能無感銘曰

於穆先生命世高志樂道唐虞洗心洙泗仲舒下帷子雲識字天降大任不勞以事明道傳經福澤千祀閒適從容遊戲文字短詠長章遠懷遐視擾擾羣愚暮三朝

四百年高風清明純粹若堂新封有銘有誌表墓貞珉
掲立昭示過者下車緇山貞士

武畧將軍彰德錄事朱公墓誌銘

人生所苦莫慘於兵亂耄倪柔弱固不能免武勇強悍
亦百不存一二當此之際識強弱興衰之勢知順逆向
背之情去暗就明舍危從安天命人事涇渭於胸中附
託得人乘風雲取富貴苟非才勇仁智邁往拔萃則不
能也僉海西遼東道提刑按察司事朱承務手狀其先

君武畧將軍彰德錄事行業求銘墓表武畧諱泉館陶人考進常仕金朝歲庚辰天兵南下公以材武智惠衆心推服義立為萬夫長遂帥衆詣太師國王軍門請命國王義其效順以公屬魯公嚴東平麾下自是先後捍禦左右周旋下名城畧遠疆日平月定旋以其誅彭義斌功陞忠武校尉割劄總領出入行陣歷十寒暑歲壬辰冬超拜武畧將軍彰德錄事當南北衝要兵餘市井蕭條官府草創躬自率下披荆榛拾瓦礫撫瘡痍集市

肆不四三年既庶而富四境隣邑政治莫能及以廉幹
稱累兼提點本路倉庫酒稅歲加增羨邦人喜公之惠
政惟恐速除又以久不得調為恨不幸以乙巳歲春二
月二十有一日遘疾而殞年甫五十有一官長朋友編
民莫不哀悼嗚呼公幼孤而能自挺植處兵亂而能服
羣豪天造草昧改代革命而能去暗附明杖策軍門而
能建功立業天下既定立政撫民而能以循廉見稱惜
乎天不假年為可傷也配趙氏胡氏先公卒再娶張氏

子男二人長曰秀行軍總把次曰思誠即承務君也女二人孫男二女七至元十年冬十月十有三日墓於安陽農安之西原銘曰

天開神武除懦孱見機而作人所難拂衣奮起羣雄間
軍門投策驚彭韓攻城畧地多苦艱枕戈衣鐵霜夜寒
功成事定四海安撫摩瘡痍披榛菅門館無私白晝閑
熙熙市井民歌歡政譽有餘壽乃慳德遺賢嗣高門闈
堅貞墓石如西山

顯武將軍安陽縣令兼輔嵒縣令李公墓誌銘

公諱玉世為林慮人父寶孝弟力田世其業戶冠鄉里
曾大父大父兵亂世系遺失諱字不可記公生十八歲
金主走汴河朔為藩障干戈擾攘不能安猷畝即自奮
拔投身懷孟等路招撫使杜公帳下以驍勇智畧受謀
克未幾拜千夫長兼提控爵顯武將軍遙受汲縣尉天
獻金德杜公以讒謗引退天兵日熾金土日削歲丁亥
公挺身內屬隸職彰德路總帥府換授總領佩符歲戊

子東平行尚書省承制以公舍逆從順帥衆來歸授武
畧將軍充總領歲丙申改授林慮汾山都巡檢使兼輔
嵩都巡檢歲丁酉兼充林慮主簿歲壬寅陞充輔嵩縣
令歲壬寅兼充安陽縣令既而帥府以林慮關官不妨
本職兼充林慮縣令後以本職兼銅冶申村兩冶鐵場
使庚申改元中書左丞兼大名等路宣撫使司激濁揚
清一時久任州縣者舉經沙汰獨公以廉幹如故重新
恩命以寵之中統二年自以祿仕四十餘年功成名遂

不得勇退為恨力以病辭既得請治生教子三致豐阜
鼓鐵煮礮所居城市凡能傭力而無恒產者魚聚水而
鳥投林相率來歸寒者得衣飢者得食窮殫者得生活
卵翼子孫累世不忍相舍去頤指氣使優游素封二十
餘年享年八十有一神識精力如五六十歲人一日傳
家政於其子曰自茲事無巨細勿復相關白吾將以閒
適終天年矣私第之東即縣學公倡始以建至是以外
戶未立身親工力以成之子孫請代其勞曰吾非強勉

要譽但心自慕樂不知其老憊時至元十七年八月也
九月十二日以食少壽隆遺訓明悉薨於正寢夫人五
張氏景氏呂氏趙氏蔡氏子男六人長曰濟部劄輔嵒
商酒監次彬襄鄧萬戶府征南百夫長不幸二十三歲
而夭其妻鄭氏以少艾孀寡苦節莫奪時人以貞節稱
之次湜以軍功爵武畧將軍金符千夫長兼造作提舉
次天一銀符彰德路鐵冶同提舉次溫次裕以養親未
仕女四人長適張氏次適陳氏早卒次適陳氏次適秦

氏孫男一十四人楫杠咬兒千壽壽山海壽同壽福山
定安長壽伯奴安壽定童玉奴孫女五人迎春適鄭氏
賽春適賈氏梅哥適鄭氏定哥桂哥未笄曾孫男四人
長孫曾孫遇僧翁惜公起身田里兵荒廢讀書又出入
行陣一旦當牧民繁劇之任吏畏其明民懷其惠勸課
字諭之暇剖決疑獄動合於古或告布縷為某人盜去
公佯不為理而斥去之默命其人詬詈所疑者盜者果
以誣罵來反告不片言而伏其辜一婦抵訴頭釵為某

人所盜公反以告者為誣三問而遣之以旅進旅退之間而察其情狀即以退先進後者為真盜不詰而請受罪農人牛舌為怨家暗夜截去公命同里近墅悉聚於庭俾人歷祝之殆徧一夫若退縮而不肯前既前牛觳觫退曳驚奔而不能挽公謂其人曰汝不仁若是夫復何言即叩首慙謝輸情吐實以法當之圃爪者告爪引蔓而將實忽為人鋤剪殆盡公命聚羣鋤使人舐而嘗之坐其刃之苦者喜受其杖而不以為冤公之臨政明斷

敏捷類是者甚衆至於度田畝之多寡不引尋丈策馬
徐步若不經意雖地形高下之不同圓方曲直之不一
往返之間先曰若干頃畝掌數者布箕推之不跬步之
差雖不知書老吏抱案來前聽讀一過是是非非詳悉
明辨不敢欺蔽其明敏過人又如此先世塋域皆在留
馬村子緣以溪澗丘壑不能增廣今卜葬於前輔高縣
南某原以十二月十四日窆諸子狀公之行以誌公之
墓請銘銘曰

污白為繙持坎作離輕重高下文深險巇此姦吏之所
素習雖明經學古達權通變者有時而陷其蒙紿之機
持狀按訊瞭不能欺摩揣不露鈞距不施情見勢屈不
得盡其辭在公而言是之謂不學而知心計鞭算勞思
苦情鹽鐵貨食泉布流行得算勝負適欠餘贏此周於
利者之不敢必材智者困於慮而弗勝目擊計得如響
應聲可緩可急有權有衡財貨豐殖義全利并積而能
散隨減隨增在公而言是之謂不學而能奮身農里卓

為能吏富貴安榮蘭玉叢萃壽八十一精健明粹老而能傳韜卷餘智易簧之言可遵可誨盥漱虛心奄然而逝此養生理性者之未易能公游刃而有餘地使公少有所學長有所養趙廣漢之御吏臨民劉士安之生財省費衛武公之年高德劭亦不難至刻石埋銘固安深邃徵文責實永永無愧

邢洺路都總管府從事解君墓碣銘

君諱晏字彥明廣宗人世業田勤苦節儉逢年積穀因

以致富水旱歲不登則推有餘以施及鄰里鄉黨之貧乏者謹厚而惠洽滋間為稱首曾祖考某祖考某繼無怠純德積久而生從事從事幼穎悟耕養讀書值兵亂科舉取士之法廢土寇縱橫強暴凌孤弱善人不能自存遂隱身縣吏托官府全性命而庇宗族焉未幾陞補帥府令史後帥府併於總管府辟充總府掾是時政治草創案牘無法大亂後人不知學用廉謹才敏超擢府從事兼提領匠局官長暨僚屬上下愛重議承

制陞遷以父母壽踰六旬力辭求侍總府知其志莫能
奪曲全孝養不敢復以煩細相干浼必深重難疑而咨
請焉謝事後日以溫清甘旨為務時年逾三十矣承意
先志竭力盡歡父享年九十有四母八十有五孝養
三十餘年如一日也非親戚鄰里有大故則未嘗頃
刻離庭閨女兄二十而寡誓不再醮友敬奉養終其
身年亦七十有八公天性樂善亦不迎媚取容聞人喜
慶歡悅若在已胷次涇渭甚明口不言人過惡治家訓

子皆有禮節配石氏廣平名家內則嚴整子男二人長曰時次曰牧時以儒吏貢部轉補御史臺掾廉能有聲考滿出職辭以親老孝養遵家法丁父憂哀毀如禮服闋今為懷孟路總管府經歷官女四人長適參知政事何榮祖次適遷山東東西道按察司事霍肅二公功名術業藹然為名卿材大夫次適中書省掾趙勵亦自卓越三人皆早孤公見其器質不凡後有遠到極力提誨故以子妻之今皆顯達其深識先見又如此次適郭某孫男

若干人享年八十有幾年月日祔葬於肥鄉某所銘曰
孝弟力田德莫厚兮生長見聞能世守兮是亦為政惟
孝友兮先意承歡登上壽兮至哉之樂神所佑兮富貴
利達孰可誘兮吁嗟斯人世無有兮世衰道微德可醜
兮昆季為讎憂父母兮孝子順孫公有後兮我銘墓石
傳不朽兮

唐僉事先德墓誌銘

奉訓大夫僉福建閩海道提刑按察司事唐珪之父享

年七十有八以至元壬辰清明前二日晨起盥漱衣冠祭祖考禮畢孫滿前酒數行徧諭家人曰吾醉矣諸子扶奉得枕而逝以明年正月二十七日扶柩歸祔於鶴壁房子山下先塋翰林學士通議大夫江南江西道肅政廉訪使高唐閻復序銘其墓碑以誌壙不可以不銘奉訓昆季踵門來請銘謹按碑序君諱聚世為湯陰鶴山人年十二而孤至性有為葬父及母霍氏繼母華氏於南澗之先壠既冠出贊於張氏婦翁六十無子君為

娶妾生子名成八月而父亡數歲而其母亦卒君為撫
字至冠昏悉以其業歸之一介不取也配張氏先君卒
子男三人奉訓其長也讀書飾吏事渡江服勞金符釋
褐杭州浙江渡提舉歷中書省左右司員外郎陞奉訓
大夫同知泉州路總管府事御史臺選僉福建閩海道
提刑按察司事仲曰璋興化鹽司副提舉季曰瑗承事
郎建寧路浦城縣尹女一人適建寧稅使張信男孫九
人居仁居吉居安餘幼未名女孫九人長適王鼎臣次

適王茂次適黃源餘在室銘曰

人能自致必也親喪送終大事孤童克當見得思義誠一不二繼絕婦翁仁及來裔八十高年率履不愆衣冠就枕蟬蛻飛仙編民市塵而有斯人養生學道愧汗沾巾鶴山崔嵬高塚豐碑誌墳埋銘松楸百圍孝義消亡公行允臧澤瀨子孫百世其昌

奉直大夫僉江西湖東道肅政廉訪司事杜公

墓誌銘

公諱伯元字亨甫姓杜氏世為覃懷人曾祖諱延祖諱彥能仕金朝官至敦武校尉祖妣趙氏父諱杲字明之避兵北至彰德遂占籍焉府主承制釋褐判彰德錄事司俄陞軍民都鎮撫權彰德府事好賢樂善一時名公大老如元遺山杜止軒主於家動為數月留歲辛亥以壽終妣胡氏勤儉敦朴公生二十五年丁卯憂服闋襲爵判本府錄事司事中統建元改充錄事秩未滿除臨漳縣丞隨授提領縣事至元二年選陞內黃縣尹省部

以東平大郡民訟繁劇不得明敏才幹者不能任其事
以公錄司事稱職授開封府錄事御史臺擇人銀符從
仕郎拜河東山西道提刑按察司經歷官未幾拜監察
御史考滿陞承直郎僉山東東西道提刑按察司事尋
除奉訓大夫知兗州事考績遷奉直大夫僉江西湖東
道肅政廉訪司事不幸得疾以至元壬辰某月日卒於
吉州分司之行館享年五十有九第四子扶柩北還以
明年某月日卜墓於安陽司空村夫人柳氏一遵姑德

子男六人長曰受益字撫謙次曰惠益字福謙次曰孚
益字守謙次曰得益字鳴謙次曰願益字好謙次曰顯
益字先謙俱才俊知讀書女四人長適夏邑主簿韓茂
卿次適王秋澗之猶子次適崔氏次幼在室孫男三人
女孫一人皆幼公揚歷中外所在有聲臨民不干譽風
憲不存諫草人莫得而稱焉姑以天稟一斑謁於銘辭
銘曰

善無近名惡無近刑中節而發識時權衡俗吏脂韋腐

儒堅冰陽閑陰闔公則炎蒸天不假年中壽泉扃四海
英游吞聲涕零為時惜才失一名卿至元流品人中之英
生既不愧沒胡不寧司空高原理勒新銘

隱士高君墓誌銘

君諱嗣榮字顯之女真人姓鈕祜祿氏譯曰高世居蓋
州金有中原徙強宗巨族分鎮州郡遂處沃州之寧晉
曾祖諱鴻哈從金太祖滅遼遂宋官輔國上將軍祖諱
索囉同知澤州事考諱某南京左營巡院使金亡以先

嘗任壽春防判恩澤在人移家於壽春歲庚子北轍至
彰德樂其風土遂定居焉警使公自以亡國之大夫晦
迹不仕以壽終公性至孝警使公捐館以刀刺額血面
弔者哀嘆亦韜先市井識者重之不敢以流俗待課諸
子讀書年甫五十誠其子勿以家事相關旬日與名士
棋博笑談輕財好施人服其義姻親孤獨者衣食之死
無所歸者葬理之春秋六十有四以疾卒配任氏亳州
忠翊校尉任遵之女也貞順慈孝中表儀則事舅奉姑

從夫訓子四德咸備子男三人長曰說濮州儒學教授次曰殷曰霖俱經明行修女二人長適其次適某孫男四人以至元戊子月日祔葬於安陽清流北原銘曰

遼宋昏庸金源啟隆惟輔國公附鳳攀龍鞭弭橐鞬告成武功為時名卿高朗令終有子克肖祖武是蹈倅貳州政民服其教乃生賢孫德文潤身部繁理劇鈞距經綸天步改玉雜身隱淪子成父志心儒迹市慈孝貞歡各極其至不求盈餘教子以書過庭詩禮為世鉅儒源

深流長墳銘固歲風水貞順松柏有光曰高氏墳百世
允臧

李伯宗墓誌銘

複堂先生李公伯宗甫吾先君子須溪先生自入小學
則與之游從志相好也晚歸城時時間客之至自城北
者伯宗何如伯宗長我十又三歲尚健否顏貌勝我否已
而郡學禮羅之為賓又寄聲必來久迺來握手談四十
年前相與為歡然不可得彊留歸踰年死喟喟惋惜問

其子當何時葬既得地否於是者八年而先君子即世
復堂之子希周與其姪自長安歸者來泣且言曰痛哉
吾父之遺言也謂吾弟客萬里外必十年乃葬使見柩
如見我孤也惟葬有期而後敢請銘也奈何乎先生棄
之天乎吾父誰當知者吾子既有聞於侍側也其著之
銘亦先志也孤也不以望之他人拜又泣且慟某重拜
而哭曰信先友也雖非其任儻免喪不死無所辭日希
周復來曰卜既吉碑謹具敢請有從季父士元所譏行

實在則受言志之廬陵之北曰福唐李氏唐西平忠武
王後自江西觀察使憲節度廣東子觀業為袁州刺史
迎葬於袁家焉自袁徙福唐及公已十三世族大多儒
五世祖時通貢崇寧乙酉高祖覺民貢大觀戊子曾祖
茂實貢紹興乙卯以書繇是公為書世家少試場屋即
有英聲門人弟子以其餘義貢於鄉者六升太學第太
常者又各一然不自貢僅庚子一試成均又以病不克
行天性篤實讀書窮理不特聰明資涉獵朱墨紛紜標注

字如蟻旁通天文地理道釋醫藥之書穴穿一貫廓然同歸先鷄而起丙夜未休如是書牕者皓首焉事大父母父母養志盡歡同祖弟三視之等同氣中年喪一兄三弟撫其孤如子必成人不負其意筆耕紙田小腆則以班族姻之貧者或勸以稍事生產作業笑曰一經不足以遺子求益耶隣有急周之不問償否或有券書聞官可責入喟然曰是區區者而以失隣好非初意也聽之卒不償亦不言平生應聘擇然後許時僚巨室惟恐不能

致授業身通轉相授者相望既屢試屢絀殆若受命庶
幾孝子慰吾意每誦三槐王氏語不自恨而科舉者負
之已矣至元丙子二月城既降又五日湖南飛騎橫衝
自宜春來道據掠季子道翔執焉五月至延安今陝西
右丞夾谷公為大尹見其不羣問焉則書生也釋縛以
賓師禮之明年改尹京兆妻以湘潭良家汪氏又明年
道翔安書從過鴈來咸謂公盛德所致公曰祖宗之澤
也書告道翔曰京兆西平王所從起也爾以遠孫數百

年後復家焉慎哉其謹確類此鷺州曹山長奇教授劉國正夢薦避賓席以待舉高年有德不求聞達公論謂然吾家先生亦稱為古所謂山林樂道之士每謂少小相從惟伯宗不欺惟伯宗澹然無求議論反覆必心所安乃止不妄疑不億信最服善嗚呼猶及公典刑今之古人古之君子也公名士甲學者稱複堂先生云生嘉定己卯九月十一日卯時歿於至元庚寅十一月初四日午時臨終未嘗甚病語不亂惟季子不一見為憾祝

十年勿葬以俟之至大德己亥十年矣以十二月甲子
葬廬陵延福鄉東原祖起邵父宏臯母胡氏儒林郎平
陽永逢寅之女娶羅氏子男三某某女一適某孫男五
某某孫女八已嫁者五某某婿曾孫男四某某曾孫女
一嗚呼公所欠者一第耳然稱明經者宗馬論靜退者
尚焉數耆舊者首焉生七十餘年修身寡過孝友睦嫗
任卹於人生大節無愧回視金張陶猗之倫豈不赫赫
一時而今何如哉竟何為哉予觀希周以諸生習吏周

旋省闈交其賢英而道翔甫流落遇知已以儒稱闊
中希周之子遠雍容和暢儒吏具宜前廉訪僉事趙
公弘道清嚴聞南北一見之安成庭中擢試之稱道之
不置惟其有以得此於人也一門競爽微公之教不及
此則公之不遇者天念之矣昔東漢李固以材學奮
前輩謂其父隱德之報公其苗裔耶吾銘公墓以待
銘曰

松耶柏耶霜雪其命蒼然歲寒既獨也正衣冠已遠孫

子逾盛不在其身在後之慶

瓜爾佳隱士墓誌銘

君諱秉直字叔剛姓瓜爾佳氏女真人也金得中原論功開國君之先得土於滑州白馬縣牛李村世爵千夫長祖諱石倫累次戰功升大元帥考諱敢合襲世爵君幼孤鞠育於從母家金亡閒居於彰德買田安陽藉田村課童僕力穡兵後惟一姊在奉養如母君自以失故家僅存此身隱德不仕賓客來置酒盡歡鄰里鄉黨或

以事相辯訟求直於公公歎曲開釋孰是孰非皆悅服
拜謝而去年高德劭親疎長幼愛敬之府主蕭侯月餽
廩粟漕長耶律公起公監大名稅皆不受夫人李氏汴
梁巨室李仲寶之女能從公志安恬於隱處公享年六
十有四至元壬辰夏五月以壽終於正寢夫人享男昉
之祿養十五年至元癸巳六月一日壽七十有八終於
男昉之任所予男一人即昉也起身吏部掾轉補御史
臺掾考滿例得七品欲便母養願降高從卑授從事郎

燕南河北道提刑按察知事至元二十八年改陞徵事
郎河北河南道肅政廉訪司知事孫男二人長曰峩今
更名承次曰昱早卒以夫人捐館之年秋七月十九日
卜塋於藉田之西北原銘曰

金源王氣天東北滅遼走宋傳飛檄同姓封王異姓侯
子孫世世相承襲門戶青雲森畫戟百年天厭東周德
識破衰榮無定在葛巾藜杖瓜田碧石風流慷慨過殘年
酒爐香潤茶煙濕妻借鄰機兒讀書誰與雞蟲論得失

安時處順樂終天墓銘不愧西山石

從仕郎真定阜平縣尹蔡君墓誌銘

君諱玠字庭玉安陽曲溝里人曾祖順妣趙氏祖琛妣李氏考祺妣馬氏君幼孤母氏辛苦教之讀書長能挺特起身彰德府掾吏業精敏府主愛重之外幕府從事中統建元首辟中書省掾以幹局稱未幾以得疾家食病愈起為本路運司經歷官至元十一年改濬州判官任滿除真定阜平縣尹年六十有八終於私第時十九

年正月六日也縣君馮氏次室劉氏子男五人曰鉉主
浦川縣簿曰鐸北京宣慰司奏差曰鈞升黃宣慰司奏
差女二人長適趙思文次適馬思忠孫男九人長曰世
昌餘幼女七人長適栗氏次適袁氏餘幼以二十四年十
二月四日祔塋於先塋銘曰

孤失天母德賢慎所習里三遷服慈訓成飛騫幕府賓
如經權應時須瑞建元嗟驥足病纏綿州復縣空自憐
命也歟誰能全祔先塋土厚堅體魄安千萬年

奉訓大夫知泗州事王伯潛墓誌銘

伯潛諱希賢正議大夫御史中丞王博文子勉之長子
太夫人申氏伯潛從父學淵源正大既冠恥以任子得
官學道日篤朝士以名父賢子同辭交薦釋褐翰林擢
編修官以幹局轉充大司農司令史不踰年改授應奉
翰林文字爵從仕郎兼會同館副使接伴使至元十七
年除承事郎太常博士明年陞奉訓大夫陝西行中書
省左右司員外郎二十年陞充知泗州事泗當東西要

衝使者旁午伯潛處之裕如也而治政有聲秩滿省親
於揚州二十五年五月二十有七日不幸得疾卒享年
四十有三是歲十月十有八日祔葬於中丞公之墓左
配胡氏少中大夫山東東西道提刑按察使胡紫山之
女子男三人皆不育女五人長適瀋陽侍御馬中順之
子二早卒二幼銘曰

唐李元賓宋王子立才學有餘年志弗遂見知韓蘇姓
名不墜我於伯潛舅甥之義壽不稱才聞者墮淚吞聲

銘墓以慰幽闕

魏處士墓碣銘

公諱仲字仲寧世為武陟人曾祖諱禎字伯祥仕金朝官至定遠大將軍同知徐州事祖諱昭字克明昭武大將軍汝州千戶考諱璧字伯玉昭信校尉河陰渡禁門萬戶公體貌雄偉襟宇弘大少直皇朝兵南被驅執北行得放釋歸故鄉以獲嘉隣鄉井遂占籍焉娶畢氏公以累世仕宦國亡家破獲免俘囚乃嘆曰消長盈虛衰

榮廢興彼此更共安有定在我亦豈不欲貴富君子之澤亦有衰歇至於不失德於里閈使一鄉稱善人斯亦足矣遂潛晦不仕以義方教子孫曰不止不行不伏不流汝輩勉力為學當大吾門享年七十有六以壽終於正寢四子長曰憲次曰宗次曰榮次曰高明憲以辯給直諒善書數至元甲戌釋褐中書戶部典吏明年蒙省劄隨路分揀阿爾布哈駙馬下戶口又明年以廉幹授彰德路酒使至元戊寅改除嶺北湖南道提刑按察司左

房書吏歲已卯移充江西行中書省掾例罷充通政院
令史歲乙酉充中書省掾是歲六月祇授勅牒彰德路
知事彰德北趨京師南達海外又當天下東西之中使
者旁午朝貢者腹背相望驛傳車馬人不勝其煩勞而
能處之裕如指顧辦集其才幹概可見矣朔望必至文
廟勸諭儒醫二學成就後進自起身入仕見知於提刑鈕
祜祿公公薨不忘其顧遇輔導二子成立曲盡憇懃宗孝
弟保家荆門安平市巡檢兼水旱站提領高明泗州稅

使孫男四人曰轄哩曰錫布曰哈濟曰安和至元戊子
冬十二月十有九日卜新塋於張俱村厚葬其考妣乃
狀其先世之德業願得銘辭而刻石焉銘曰

願子孫之昌榮察化機之變更身富貴兮踰分日隆午
而月盈此天道之固然何貪冒之昏冥嗟魏侯之獨賢
甘混迹於編氓潛盛德而不耀恐無實而有聲竟終老
於衡門得隱者之佳稱萃蘭玉於一庭從事公之最良
晦既久而啟明已為世之名卿蘊孝思兮追遠樹貞石

而勒銘百千世而不磷表鬱鬱之佳城何有乎今若此
豈積惠之無徵

什達爾夫人墓碣銘

夫人回紇國王哈里沙之女皇太弟位下管領內外徹
辰扣蘇珠克台之妻也父母鍾愛命名曰什達爾中統建
元奉王命送公主東嫁布達駙馬以路梗不能西繼聞
夫亡特旨命夫人廩祿庖肉春秋裳衣於大王所封之
食邑遂家彰德勤儉清慎享年四十有九以疾卒於至

元二十五年冬十月二十有六日一女名托克托倫適懷
遠大將軍彰德路達嚕噶齊兼諸軍鄂勒達嚕噶齊兼
管內勸農事某卜葬於彰德郭西刻石埋誌墓不可以
無碣銘曰

父王封夫近臣富與貴終其身謹蠶麻采蘩頌德如玉
心無塵女克孝壻得人墓有碣銘于春

雄辨大師塔銘

師號德清族出安陽王氏生七年伏犀挿腦頰顴隆起

眉目清峻不凡龍岩寺僧深公見而異之乞師於其親
其親亦以語言動作非諸兒童比終為塵網縛遂割愛
以從其請棄家為釋子授僧服學佛經日誦千言既長
談法持論辯若懸河諸經正言疑義闇誦講解臨衆升
座食頃數萬言並無隻字遺訛理順義明滾滾不窮大
堂廣會圍坐數十人師一發聲傾耳屏息間然無辯語
竟無敢能繼者平水壇主素慎與可賜師為講主歲庚
戌春靈山壇主燦公付師以海雲頂血所書金字大乘

菩薩三聚淨戒本龍文僧迦黎衣賜號妙嚴宣明大師
中統二年冬昌童大王遣僧詮來錫恩命至元八年春
皇帝賜衣一襲上都新宮成詔集天下名僧作資戒會
以落落陞師為都壇主賜號妙嚴宣明雄辯大師師登
席演法甚愜上意面命升御榻賜白金五十星玉龍首
手杖一枝一時僧俗咸以為榮師荷聖恩優渥即以賜
金印大方廣佛華嚴普賢行願經疏四十餘部流通開
演仰祝聖壽至元十六年三月二十有五日聲鐘集衆

傳付信具於後人湯沐更衣登座曰衆僧西向立為我誦彌陀佛號少頃曲肱脇席西首加僧服而逝師住三十八年僧臘七十三弟子澄照澄志滿等為師築浮圖於龍岩寺先師燦公之墓側磬石已竟狀師之德業來請銘師與予為方外交亦有年矣律已清嚴奉教篤信每晚濟生為業行之終身無一日廢輒接物諭人以和聰明過人遠甚而退然若不足以釋學無不洞究不叩則不鳴不以記問為所長余之所見者如此銘曰

日誦千言不泥文字戒律精嚴安若無事萬葛千藤
笠蹄講肆象設鐘魚冥寂聽視世眼識公為談法士名僧
推公得大乘志兩觀天光優禮殊賜傾動一時雲披川
駛曲肱長往不昧不二高標倚雲銘石以誌凝神塔宮
何千萬祀

大聖山孝思禪院廣公和尚塔銘

公號子廣出寶定李氏少孤惄大父母鞠養成立貞祐
避兵徙河南祖七棄吏業師事南陽縣彌陀院瑛首座

授僧服篤志好學敬信不懈國朝平河南北度歷邢洺
磁講席受華嚴法戒觀圓覺金剛等經深入理窟頴悟
性天再參問於冠山徹公徹法中龍象也公以真積力
久之學又得賢師為之依歸言下頓悟目擊道存不數
歲特嗣庵主隆慮純禪師住持三陽大聖山洪濟院日
月既久求承嗣而乏人聞公道眼明白戒行精嚴命駕
邀於魏與之偕來純即退休公住持三年門風孤峻行
已高潔亦就辭謝前鈞州刺史權沁南軍節度使兼懷

州招撫使正奉康公隱居西山以其先塋之故買田八
百畝水磑一泓立孝思禪院於大聖山南疏禮邀公園
蒲容膝三十餘年鼓磬鐘魚香火經律猶一日也薰沐
後學入室者六人升堂者二十有三人授戒者三百餘
人至元十年三月五日付院事於德堅將淵默以終身
嶧山寶嚴寺文疏敦請不能辭是歲五月二十有六日
集衆齋畢而言曰人之生死數莫能逃我今辭汝輩去
世矣聲絕而逝壽六十有七僧臘四十荼毗日僧行白衣

五百餘人舉火而雨火亦不滅獲舍利數粒豆如也門人於寶嚴孝思兩立浮圖焉公枯淡儉約衣不絮帛紙布以禦寒熱夜暗不火其能外形骸也如此則於外物可知矣銘曰

眼耳鼻舌有竅弗開鏡明水止湛然靈臺長逝非往閱世非來萬有一空孰為形骸六十七年不掛纖埃以公為生槁木枯荄以公為死烈風迅雷生莫能喜死莫能哀門人思公塔宮崔嵬入滅出見乃優乃俳刻名豐石

百世不摧

行狀

龍虎衛上將軍安武軍節度使兼行深冀二州

元帥府事王公行狀

公祖諱載字德厚不仕祖母張氏父諱清字正甫東鹿
縣竇家莊酒監母張氏公諱義字宜之世為寧晉人純
厚沉默寡言襟量淵廣喜愠不形諸容讀書求意義不
泥章句訓詁金衛紹王遇殺天兵南下宣宗失燕走汴

河北郡縣雖開設守令而政治威令解弛沮喪土寇四起力不能治弱肉強食互相殘賊奔竄莫知所依縣人羣聚相謂曰王公素寬仁材智足以保衆成事吾儕小人智力寡弱紛擾無所歸不有主者則將無噍類矣一唱百和同聲相應遂推公為萬夫長攝行縣事尋號為都統歲癸酉冬太師穆呼里國王提兵至城下公率衆歸命太祖皇帝嘉其効順寵錫寶鞍名馬二授寧晉令兼趙州等處招撫使時兵荒歲飢人相食縣東大澤周

匝數百里中有城曰瀝城公曰瀝小而完水多魚藕足以起餓殍禦衝突以麾下李直守寧晉身率衆東徙全活者甚衆他境白骨滿野獨公所治無易于析骸之禍邑人垂白之老猶能記其事至今道舊笑樂感慕為之泣下乙亥秋金將李伯祥稱太守據趙州太師國王促公伐之會夜大風雨公命衆負攻具去城二里而止下令軍中曰先登者賞後者殺以徇夜鼓四環城飛登上陴者皆熟寐城潰伯祥孤身走天壇砦軍士無敢剽掠

州民安堵焉太師國王表公之功授趙州太守兼趙冀
二州招撫使丙子秋南取鉅鹿洺州南宮三城是歲冬
十有二月還軍至唐陽西九門遇金將訥爾錦戰率冀
州節度使柴茂等將兵萬餘北復郡邑公伏兵桑林先
以百騎犯之訥爾錦棄輜重來薄戰伏起金軍駭亂奔
北獲訥爾錦弟萬戶濟呼戊寅拔東鹿進攻深州太守
張公以城降順天都元帥張柔多公之能軍表奏授深
州節度使兼深冀趙三州招撫使秋八月金恒山公武

仙擁衆四萬攻束鹿公烽火謹斥堠遠比至而預備仙
諭衆士曰束鹿兵少而糧不繼且無樓櫓池隍一鼓必
拔仙於城外盡攻擊之術公城中守禦有餘隨機拒應
首尾二十餘日大小百戰每戰必捷一日公集軍士議
曰外無援兵芻粟內絕曠日持久非我之利益若突圍
一決勝負安能坐困為人縛執也衆曰善願唯命遂令
老弱乘城間以草人多立旗幟夜五更未盡率死士三
千闢闥直擣仙營人人殊死戰仙軍亂誅殺殆盡獲軍

資器械無筭仙率麾下百餘騎走真定公乘勝追奔遂
北大捷而還太師國王聞之遣使賚銀符十寵公及榮
耀有功者庚辰秋拔冀州獲節度使茂械送王府城中
市不易肆張帥復稱表上功授公龍虎衛上將軍安武
軍節度使行深冀二州元帥府事佩金虎符由是隣境
諸城畏愛公之威德悉來服屬亂稍定招集逋亡教之
耕作深冀之間首為樂郊辛巳夏五月恒山公仙辱東
鹿之敗以裨將治中盧秀會太守李伯祥南取趙州公

知之提兵西援比至趙瀝二城皆陷新河王主簿十餘人以妻子被執皆叛歸仙秋七月公具舟楫紀家莊盧李戰艦數百沿流而下公曰彼兵雖衆水戰非素習也以我之長擊彼之短實我軍之時也乃以繩貫舟橫截下流敵至先之以矢石戰鬪斬繩公舟翼而擊之我軍勇奪彼舟殺千餘人生擒治中盧秀洎軍士五十七人伯祥走瀝進攻之不下還屯滿家泊冬十月復攻瀝瀝之女牆束葦為之夜灌以水乘寒為冰城環列戰艦晝

夜流行不令水凍以拒守公捉士卒挽舟於水絕渡而攻伯祥西走二子死焉敗卒爭舟溺死者十六七獲伯祥之幼子山兒士卒欲殺之公曰伯祥雖吾敵絕人之後不祥教養如己子復獲叛吏王主簿輩左右爭刃之公曰人各為父兄妻子非背我也皆釋之壬午秋太師國王南征伯祥降歸其子及家人十餘輩伯祥再拜號泣而謝曰白刃戰敵之前存活此兒使吾父子復相見李氏之鬼血食不絕公之德歿身不能報壬午秋攻拔

澤潞二州及山砦數十不妄戮一人獲生口數十皆遣
還之或父子離散為人執掠者必購贖使之團聚每戰
勝軍中金帛堆積一毫不取也公攝帥府金經李佛兒
以妖術惑衆謀亂有司連繫十餘家公白主者曰首惡
者當誅愚繆不識義理為人蠱惑而不知為罪者可以
情恕全活者萬餘人癸巳秋邢州土賊偽號趙大王聚
衆數千人據任縣固城水寨真定五路萬戶史公集諸
道兵攻之踰年不下公一鼓拔之獲趙大王侯縣令數

十人公白史公曰脅從者非賊也宜免死即釋歸鄉間一境遂安歲在甲午以病退還鄉里常戒諸子曰我起身農畝汝輩當力田讀書母妾求名利己酉夏四月二十有五日薨於東鹿縣回生村私第之正寢享年六十九某年月日祔葬於寧晉縣唐城鄉北孟莊之先塋四方之來會葬者數萬人冀人懷公之恩作黃錄大醮三晝夜追薦之迎神主至其境拜人塞路迓祭曰是活我父母妻子者失聲痛哭道路過者亦為之吁嘻到今

歲時上塚不期而來者動以千數公夫人三張氏李氏
李氏子男七人曰植字茂才趙州節度判官曰松字國
才不仕曰檜字公才歷贊皇沙河二縣令曰楨字叔才
不仕曰楫字季才不仕曰椅字彥才釋褐王府掾歷中
書省左右司員外郎大名等路宣撫司郎中左三部郎
中大名等七路宣慰司郎中戶部郎中奉政大夫同僉
徽政院事兼領太府監奉議大夫同知順天路轉運司
事佩金符少中大夫順天路轉運使中議大夫吏部侍

郎中書省給事中少中大夫彰德路總管兼鄂勒佩金虎符曰棟字子才真定鄂勒千戶女六人曰茶哥適山東道勸農事董文用曰翠哥適寧晉縣鄂勒千戶李天祿曰娃哥適大名府董總管男若水曰仙兒適寧晉寧縣主簿杜彥曰秀仙適完州酒稅使石德潤曰旺哥未笄而卒孫男一十八人女一十九人祇適於椅定交近二十年知王氏父子為頗詳故錄公平生大節為行狀至元十年四月朔武安胡祇適謹狀

欽定四庫全書

紫山大全集卷十九

元 胡祇遹 撰

祭文

祭伏羲氏文四篇

仰天俯地畫卦造書德通百神情類庶物發天人之奧
妙開耳目於蒙聾百獸率馴羣生成遂修燔炮以代血
毛之食從簡樸以服皮羽之衣聖冠百王功垂萬世敬
因秋祀式薦明禋

代天而言作民之極誠孚德覆獸伏鳥馴法乾效坤開物成務前王無配後聖是師茲率舊章載嚴秋祀

生民之初標枝野鹿不生大聖聲瞽孰開火化既修人倫既序有綱者政有確者文獸不爲災人貴於物爲民立極惟皇之德

神龍負圖人文斯定絡馬鼻牛以前民用燧火熟腥以濟民病控侗顓蒙是彝是訓穴居豕游有倫有政盛德大功孰非元聖

祭神農文四篇

斷耜採未教民務農饑而食寒而衣疾而醫病而藥五
穀盈廩百草圖經通天下之財成日中之市天縱將聖
福我後人澤流無窮禮宜通祀式因常報敬薦秋成
火瑞格天太昊齊聖五穀既藝百藥備嘗克當天心以
壽民命萬世永賴神功益彰稷黍西成敬陳常薦
草食而毒鮮食則艱黎民阻饑皇則食之耒耜既陳黍
稷藝之草木金石等差愈疾既飽而嬉既壽而安追本

推原惟皇之恩

襢襢勒未教民粒食別味嘗藥人無夭疾化國樂郊虎豹遠跡居居于于民朴俗一教行化成莫知刑辟火瑞火紀萬世仰德

祭黃帝文三篇

鑄兵除暴垂衣御宸備百物以濟民生登九天而成聖業冕服有制禮樂用彰貽百篇蘊奧之內經開萬世無窮之壽域恪遵祀典仰答神休茲因西成敬陳常薦

雲瑞受命神化宜民中立兩儀正名百物力牧作相岐
伯作師立政立言仁壽萬世爰因常祀敬薦庶羞

聰明既開姦偽滋起惟皇作君威以弧矢垂衣而治禮
樂亦明飽食逸居百疾交攻惟皇隱憂作爲醫經扶危
而安起死而生著書垂訓民無夭札後之爲君仰茲成
法官室車輿裳衣軒冕百物咸備以濟時變定歷作樂
談醫論道躋民仁壽既富而教創制立法畢具無缺後
聖後臣無損無越

祭五臺山神文

某官某謹遣某致祭於五臺山神方今聖天子在上百
神受職嶽瀆之外名山大川在一方者望秩禮畢守土
官歲時致祭未嘗廢祀聖天子恐土人之不誠潔黍稷
之非馨時遣名僧作佛事以祭國家敬恭明神匪懈匪
怠惟神歆受明禋不可不垂報祐興雲霧雨潤枯蘿旱
神之職也雨澤愆期年穀不登災及於民豈神之欲也
至於獄冤滯而不理吏曠恣而弄法賦稅不均政治不

舉冤憤充塞干犯和氣此土官之罪非民之罪也降災致罰請加諸身比歲秋旱太原一方之膏澤神實主之聖天子禱祀之誠惟神其鑒之深山大澤實生龍蛇既能生之必能役之起蟄龍飛瀚海一洗魃虐此神之賜也某等之望也尚饗

祭汶水神文

維大元歲次癸未四月乙酉朔越四日戊子某官某謹致祭昭告於汶水之神聖天子臨御二十五年於茲矣

五行循序庶徵惟和聖算睿思以謂水由地中行猶血脉之榮一身大經絲絡一有溢滯則身爲之失和所以敷平導決地平天成萬世永賴夏禹以爲已任八年於外而不辭也惟神載在經傳實爲名水惟其開導修潔之不至障塞壅蔽曲爲隄防不惟不盡神用而爲民害是用命某等敬順神德轉失爲功乘水潤下直走京師遐方異域月輸歲貢如山如阜不復告勞神之力也伏願祈寒不能凝其行秋潦不能鼓其勇載泛載浮有恒

無替四時牲酒肥腯馨香著之祀典與國無疆尚饗

祭泗水神文

維大元歲次癸未四月乙酉朔越四日戊子某謹致祭昭告於泗水之神皇帝事天勤民神人咸喜六合之內名山大川能興雲致雨者罔不望秩禋祀海瀆受職川澤効靈九夷八蠻通道致貢陸行山宿輪蹄因憊浮重致遠無若水運是以按圖命官疏導穿决舟楫所通遠邇咸集惟神源高委長徹達南服來威來庭萬里取便

某等拜受廷命開除壅蔽疏導堙淤贊神功而舒民勞
達方物而饒國用伏願旱不淺澁霖不濫溢溶溶漾漾
不舍晝夜祥飈送驅櫂歌奏功與國無窮廟貌血食尚
饗

西冶祭金火神文

某年月日某官某謹致祭於火金之神惟神祝融正號
蓐收表功炎熾而威從革而利成熟庶物刺裁萬堅列
五材以養民分四時而成歲神功相協國用以饒方今

我國家外修武備內敦農桑欲成其功先利其器兵則
戈矛劍戟農則耒耜鋤耰有備無虞闢一不可分命厥
官大典諸治某等董工就事備物具材有炬既明有橐
斯舉謹占吉旦敬告明神伏願炭熾而堅礦銷而利出
埽江河之決積金山岳之高恪遵彝儀式陳明薦尚饗

皇城啓土祀神文

奠安神鼎已成萬雉之崇墉拱衛皇居宜亘重圍之禁
宇土功率舉坤靈寶司再獻明禋用符卜吉遵自周之

宅洛肆於郊以用牲雖楨幹畚鍤之暫勞庶外內闢廷
之咸脩邦基永固神庥是扶

彰德路祈雨文

闢潤民之實惠怨語升聞忤造物之至和亢陽示譴貪
汙失德黎庶何幸黍稷吐穗而中乾麻豆成陰而半槁
工商憂穀價之增貴田野懼歲凶之死饑小大焦勞賢
愚愁嘆某等任守土之切責先祈年之隱憂悔罪懷慙
痛心疾首仰干慈造屈賜哀矜勅名山而詔大川起癒

龍而誅旱魃曷勝慶幸無任恐惶

祭杜元伯文

菌耳無日蟪蛄無年人莫之恤各盡其天長松千尺可
駕萬椽源泉混混可別萬川天闊淤塞拔本塞源生也
何厚廢也何偏天生蒸民袞袞同類愚蒙駕庸萬不一
慧白玉樓成鵬鳥投墜與也何難奪也何易嗟嗟元伯
百未一施玉冠而溫山立而儀童稚讀書警穎不疑一
日千里迅不可追弄筆措辭汪洋陸離先覺有言杜氏

有子過庭之訓曰詩曰禮業之後先學之源委業日益廣行日益成洗眼一飛傾耳一鳴一入京師四海知名孰謂一疾奄忽泉扃嗚呼造物各相乘除富貴壽考多歸魯愚才名一鍾命則不腴此何不足彼何有餘誰司權衡校鑑量銖父兮爾思母兮爾哀過君之門愴余之懷人之有死如旦之暮死而無憾而謂之數獨於吾友怨激無訴有淚何窮一瀉君墓嗚呼哀哉尚饗

祭趙繼先墓文

某年月日某謹以清酌之奠祭於亡友繼先之墓君始
自魏來相扶老携幼謁我先人先人指君呼余而言曰
斯人也陵川趙會元公定先生之子也母李氏河中李
金吾之孫欽止欽叔之妹欽若欽用之姊也爾祖治解
欽止爲縣屬公定爲門客姻好締交爾祖實成之也三
世通家親若同姓宜善交之故繼先稱我先人以舅不
肖於君之母敬以姑禮拜之子姪輩歲時伏臘往來慶
賀自時厥后僦舍同里氣相噓沫相濡若此者將十年吾

友以世為西人還家之念日往來於心不肖輩懇不能
留奉母氏挈妻子復歸故鄉後三祀以西州地僻土瘠
生理艱苦舉家復東來行李囊橐敝廢無幾所可喜者
母壽而康子孝而壯不肖一二友人謀曰繼先純誠仁
厚執守有餘而變通不足蹉跎蹭蹬窮乏困苦我輩不
得不任其責且善人信人人不知恤天必祐之茲議未
乾而不肖應召東方私自喜曰拔茅連茹一二友舊亦
庶幾脫窮苦矣如繼先者又窮苦之甚者也至則當立

引之時異事異齟龉梗塞願莫之遂繼而聞吾友有喪
偶之憂驚悼感嗟念君之老母在堂子女未婚嫁家四
壁而中饋乏主計何以爲懷也今未踰月吾友亦謝世
嗚呼天乎報施善人誰其司之如無有司之者吾之哀
鳴伸訴則亦已矣如其有之則生殺禍福之理何乖謬
若是哉不然推窮斯人致疾之由取怨之故意無得而
言乎嗚呼天地鬼神不可以忿激怨咎善人不壽求之
人爲則又無所愧憾焉然則哭友之哀何時而已耶霜

風一肅千草萬木適足收藏之氣充然而誠實者幸也
或花或蕾方向生榮隨時而枯落者不幸也然則生殺
之於草木亦欲以善惡求之哉嗚呼吾友阨窮而死沉
沉九原當自安之人之取友生不分財惠以相周死不
知恤其家非友也問而老母撫而諸孤義也吾友之疾
不知相扶持吾友之亡不得相付託雖然在不肖輩敢
忘於心哉神靈其鑒之嗚呼哀哉尚饗

祭王中丞子勉文

我年十七君冠而婚君來自東識我先人命我以兄事
君如神我於是時總角未巾雖曰爲學罔有見聞觀君
落筆湍水飛雲觀君立言天葩奇芬從君切磋脉理始
分從君琢磨精粗有倫如醉而醒如夜而晨日往月來
越十冬春秦王開府招賢禮賓明年渡江智勇獲伸君
以才學拜首綸恩中統龍飛官制一新勲德譽望立朝
名臣揚歷中外應瑞昌辰官三十年雍雍申申優遊者
舊詔掌絲綸豈其一疾絕筆獲麟四海知君莫如我貞

羣賢愛君莫如我親百犯不校量海無垠萬事無心性
天安仁不加不損貴富賤貧與君交游如酒飲醇將期
暮年林下水濱一觴一詠不厭煩頻談天人學精義入
神觀萬物變闢人易門言不虛立聖經翼輪行無妄動
高風絕塵嗚呼天乎奪我鎔釣醉地呼天哀怨終身英
靈在天聽我斯文

祭宋海卯文

不爵而貴其貴益尊世嗣宦達賢而有文先生間居家人

嚴君不祿而富其富愈足風亭水軒夏清冬燠法書名
畫牙籤寶軸先生燕居羲皇遐域八十康彊孰謂不壽
名卿才士半師半友譽望一時孰謂不偶天錫五福或
薄或偏先生之身獨擅兼全先生觀化造物兒童海卵
一點萬象皆空天上人間去住我從談笑易簣無喪無
得嗟嗟後學失所矜式敬置几筵有淚沾臆

哀辭

李仲常哀辭

觀林林之兆民兮紛如禾麻竭智盡力兮不能溫飽乎
其家豈其忠之不欲兮蓋才能之靡加細民之愚拙固
不必言兮又常觀夫在位之多士自矜自負兮謂舉世之
不我似才足以王佐道足以命世及其食厚祿處大位
兮曾不辨乎一事雖僥倖於一世兮而不知佩無窮之
愧恥豈其情之樂然兮亦秉賦之不美天地生萬物而
人爲最靈兮何每每之若是無乃造化元氣迤邐而衰
薄兮故生民之庸鄙不然何夔臯稷契伊傅周召無於

此而萃於彼嗟人材之不生知兮學校教養之法安忍
亦從而廢吾友仲常幹而廉才而知兮而又得乎展驥
足之地方將與韓滉劉晏並驅而爭轡兮惜哉天不假
年甫半塗而殞墜噫吁嚱才難之嘆方興兮又見斯人
之長逝九原既不可起豈惟理滅乎成筭心計之忠而
已改使公帑私藏不得速覩夫錢流於地之治忍哭吞
聲寫余之哀挽兮不覺霑臆從橫之老淚

